

Comité Schnitzelbänke

Gigolo-Clique



1. Siegeslorbeer gits halt leider  
Uffem Blaue kaini.  
D'Mulle macht fird Katz e Grenn,  
Und däm Ganze sait me denn:  
Der Kampf geht mit unvermin-  
deter Schärfe weiter!
2. Gohsch durd Schtadt, sehsch irgendwo  
Sone Fähnli gwehnlig.  
Schreisch am Beschte sofort Hail!  
Susch griegsch uff dr Kopf dy Dail,  
Denn der Louis haltet dert  
Fahnewacht perseenlig.
3. Kepft wird, wie im Dritte Rych,  
Draumt dr Wällehitler.  
Kepfe sott me-n-alli Wält,  
Wo nid glaubt, was är verzellt,  
De Gnorzi wärs nadyrlig glych,  
Die dängge mitem Fidle.
4. D'Quo . . ., die hänn gha  
E bsundere Gidangge:  
S'Dechterli danzt mitem Sohn  
Zue de Gläng vom Jagg Hyldon,  
Dä lacht sich dr Ranze voll:  
Sibedausig Frangge!
5. Soviel griegt emänge nid  
Mitem zämmespare,  
Sibedausig Stai sinn hit  
Ganze grosse Bolle Kitt —  
Uff dr Volggssbangg wäres zwor  
Numme dreihalbe.
6. Uns ein starker Mann tut not,  
Lueg au do dä Dubel!  
Heil Import-Helvezia,  
Isch bin fir dr Adolf da,  
Y nimm als guete Patriot  
Rentemark und Rubel.
7. Ei was isch au unter dem Misch!  
Gäll das nimmt di wunder.  
Dr Herr Oberscht, s'isch kai Schlägg  
Gohet em Duce an dr Schbägg,  
Kratzt an dem dr Misch ewägg:  
S'isch nidemol Dabete drunter!
8. Alli Veegel sin nid do,  
Wo's het in unsre Muure.  
S'dät no huffe Veegel gä,  
Womer miesste häre näh,  
Wemmes allne wetti gäh —  
Das dät vil z'lang daure!

Kemmet alli am nägschde Sunntig an  
Schlussobe in Musigsaal.